



**CONVENIO DE COLABORACIÓN ENTRE A CONSELLERÍA DE POLÍTICA SOCIAL E IGUALDADE E A FEDERACIÓN DOWN GALICIA E AS SÚAS ENTIDADES FEDERADAS, ASOCIACIÓN SÍNDROME DE DOWN "TEIMA" DE FERROL, ASOCIACIÓN SÍNDROME DE DOWN DE A CORUÑA, FUNDACIÓN DOWN COMPOSTELA, ASOCIACIÓN SÍNDROME DE DOWN DE LUGO, DOWN PONTEVEDRA "XUNTOS" ASOCIACIÓN SÍNDROME DE DOWN, DOWN VIGO: ASOCIACIÓN PARA EL SÍNDROME DE DOWN E ASOCIACIÓN DOWN OURENSE, PARA O FINANCIAMENTO DO PROXECTO DE APRENDIZAXE E INCLUSIÓN SOCIOLABORAL NO EXERCICIO 2025**

**MEMORIA XUSTIFICATIVA**

A Comunidade Autónoma de Galicia, segundo o establecido no artigo 27.23 do Estatuto de autonomía de Galicia, en consonancia coa habilitación competencial outorgada ás Comunidades Autónomas polo artigo 148.1.20 da Constitución Española, ten competencia exclusiva en materia de asistencia social, polo que, na súa virtude se aprobou a Lei 13/2008, do 3 de decembro, de servizos sociais de Galicia.

A Consellería de Política Social e e Igualdade é o órgano superior da administración autonómica ao que lle corresponde as competencias en materia de servizos sociais, e consecuentemente a atención do colectivo de persoas con discapacidade, conforme ao Decreto 139/2024, do 20 de maio, polo que se establece a estrutura orgánica da Consellería de Política Social e Igualdade.

A Federación Down Galicia, entidade de natureza asociativa, figura inscrita no Rexistro de asociacións có número 1998/000003-2ª, conforme á Lei orgánica 1/2002, do 22 de marzo, reguladora do dereito de asociación.

Forman parte da Federación Down Galicia as entidades Asociación Síndrome de Down "Teima" de Ferrol, Asociación Síndrome de Down de A Coruña, Fundación Down Compostela, Asociación Síndrome de Down de Lugo, Down Pontevedra "Xuntos" Asociación Síndrome de Down, Down Vigo: Asociación para el Síndrome de Down e Asociación Down Ourense.

O obxecto do presente convenio é contribuír ao financiamento por parte da Consellería de Política Social e Igualdade das actuacións que a Federación Down Galicia e as súas entidades federadas desenvolven no ano 2025 para a realización do proxecto de aprendizaxe e inclusión sociolaboral.

Este proxecto ten por destinatarios a persoas coa síndrome de Down maiores de 16 anos, que teñan unha porcentaxe de discapacidade recoñecida superior ao 33% segundo a lexislación vixente, inscritos como demandantes ou mellora de emprego.

Previamente farase a selección das persoas participantes directamente polas sete entidades federadas en base a criterios consensuados a nivel conxunto en Galicia polas entidades federadas e a Federación.

Atenderase, a modo de previsión, a un total de 24 alumnos/as.

Para participar no proxecto é preciso ter rematado a etapa de escolaridade obrigatoria e





ser autónomo en desprazamentos ó lugar de traballo ou estar en disposición de adquirir as habilidades para poder facelo.

A metodoloxía empregada que configura o proxecto de aprendizaxe e inclusión sociolaboral estrutúrase en dúas fases:

a) A formación teórica dende a Federación Down Galicia a as súas entidades membro, impartida nas dependencias da Federación e entidades federadas para o aprendizaxe e práctica das actuacións que esixen nos servizos vinculados a postos das dependencias administrativas nos que se desenvolverán.

A Federación realiza a coordinación autonómica de parte teórica e práctica a nivel de metodoloxías e contidos, así como o seguimento autonómico co peche da xustificación técnica e económica do conxunto do proxecto a nivel Galicia e a auditoría de todo o proxecto. A Federación non imparte directamente formación teórica e formación práctica, toda a labor formativa de impartición directa ás persoas participantes, realízase cada unha das entidades federadas con persoal propio da súa razón social.

b) A Formación práctica relacionada cos contidos teóricos programados é útil para dispensar aos/as alumnos/as participantes unha visión práctica necesaria para completar as accións de formación e aprendizaxe. Acompáñase ao presente convenio como Anexo o documento de formación teórica e práctica ofertada e a súa descrición.

A formación práctica desenvolverase nas instalacións da Xunta de Galicia, concretamente nas distintas dependencias dos servizos centrais e periféricos adscritas á Consellería de Política Social e Igualdade, nas cidades de Lugo, Ourense, A Coruña, Ferrol, Pontevedra, Vigo e Santiago de Compostela, de tal xeito que, o alumnado poderá asimilar dita formación dun xeito moito máis efectivo.

Os/as alumnos/as participantes que accedan á formación, para o aprendizaxe coa práctica das actuacións que esixen os servizos vinculados a postos das dependencias administrativas nos que se desenvolverán terán o apoio dun/dunha técnico/a designado/a pola Federación Down Galicia e as súas entidades (preparador/a laboral) que terá como principal cometido instruír ao/a alumno/a no desempeño das tarefas que se realicen nas ditas dependencias administrativas. O persoal preparador laboral deste proxecto esta contratado en cada unha das sete entidades membro, a Federación coordínase co devandito persoal a nivel de metodoloxía e contidos, así como para realizar todo o seguimento autonómico e o peche da xustificación técnica e económica do conxunto do proxecto.

Por outro lado, cada alumno/a participante recibirá a súa formación práctica supervisada e dirixida durante a súa realización por unha persoa profesional da administración (facilitador/a) coa que a persoa alumna participante con discapacidade fará a formación práctica que será a persoa coordinadora e responsable da súa formación nas dependencias administrativas, designada pola persoa competente das delegacións territoriais e servizos centrais da consellería de Política Social e Igualdade asumindo que a súa actuación será en todo caso como formador/a e non como superior xerárquico da persoa que apoia. As funcións da persoa facilitadora da administración a desempeñar serán de asesoramento, orientación e dirección da persoa participante en formación práctica para coordinar de forma eficaz as tarefas que deba realizar, así como informar do





grao de cumprimento dos obxectivos planificados conforme ao proceso de avaliación continua que programa a federación Down Galicia e as súas entidades. O persoal preparador laboral esta contratado nas entidades federadas encargado de contactar co persoal facilitador dos servizos ou unidades administrativas da Consellería de Política Social e Igualdade onde se realiza a formación práctica.

A duración diaria da formación práctica será de media 3/4 horas en horario a definir en función das necesidades das persoas participantes e das dependencias da Consellería de Política Social e Igualdade receptoras da formación práctica.

A data de inicio das accións formativas nas súas fases teórica é dende o 1 de xaneiro 2025 e a formación práctica será a partir da sinatura do convenio e finalizarán o 31 de decembro de 2025.

As persoas participantes poderán percibir unha axuda de custo destinada a sufragar os gastos necesarios para asistir á formación, como o transporte ou manutención.

As persoas participantes contarán cun período de descanso no mes de agosto por vacacións do persoal de apoio.

Para o cumprimento da súa finalidade a Consellería de Política Social e Igualdade achegará cento setenta mil catrocentos corenta con vinte céntimos (170.440,20 €) que serán imputados á aplicación orzamentaria 08.04.312D.481.1 dos orzamentos xerais da Comunidade Autónoma de Galicia para o ano 2025.

Asociación Síndrome de Down "Teima" de Ferrol	24.348,60€
Asociación Síndrome de Down de A Coruña	24.348,60€
Fundación Down Compostela	24.348,60€
Asociación Síndrome de Down de Lugo	24.348,60€
Down Pontevedra "Xuntos" Asociación Síndrome de Down	24.348,60€
Down Vigo: Asociación para el Síndrome de Down	24.348,60€
Asociación Down Ourense	24.348,60€

Conforme aos requisitos previstos no artigo 19.4 c) da Lei 9/2007, do 13 de xuño, de subvencións de Galicia, e no 36 c) do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia, a federación Down Galicia e as súas entidades membro correspóndelles a representación dos intereses de todas as persoas con síndrome de Down na Comunidade Autónoma de Galicia, e a prestación de servizos de calidade na súa atención. Realizan un programa específico para favorecer a inserción social e laboral das persoas coa síndrome de Down. Polo carácter





especializado deste proxecto, a Federación Down Galicia e as súas entidades membro son as únicas habilitadas para a súa execución, dentro da Comunidade Autónoma de Galicia.

Tendo en conta por unha banda a especificidade do proxecto polas características da actividade que se vai financiar, o colectivo ao que van dirixidas, e a ausencia no ámbito territorial de aplicación de entidades alternativas que dispoñan da infraestrutura material e medios humanos esixibles; e por outra a súa adecuación ao ámbito competencial da Consellería de Política Social e Igualdade, conforme ao previsto no Decreto 139/2024, do 20 de maio, polo que se establece a estrutura orgánica da Consellería de Política Social e Igualdade, en tanto que se trata de persoas con discapacidade intelectual, e as específicas necesidades inherentes ao colectivo ao que van dirixidas, considéranse razóns que acreditan o seu interese social, quedando xustificada a imposibilidade de promover a concorrência pública en aplicación da Lei 4/2024, do 27 de decembro, de orzamentos xerais da Comunidade Autónoma de Galicia para o ano 2025, en relación do artigo 19.4 da Lei 9/2007, do 13 de xuño, e ao Decreto 11/2009, do 8 de xaneiro.

Asinado dixitalmente en Santiago de Compostela  
A directora xeral de Persoas con Discapacidade  
Begoña Abeijón Fernández

